



ACEB

ARCHIV CULTURAL
ENGIADINA BASSA

Rapport annual 2017

Società

Il numer da commembers dal ACEB s'amunta per la fin dal 2017 ad 88 personas singulas, 43 famiglias o conjugals ed 8 personas giuridicas.

Suprastanza

Aint il rapport annual dal on passà vaina fingià explichà cha'l cumün da Valsot saja interessà da vender la chasa da scoula a S-chadatsch. In üna charta dals 15 settember 2017 ha il cumün da Valsot dumandà scha la società ACEB saja pronto da cumprar il stabilimaint. La suprastanza vaiva decis fingià plü bod da nu vulair, scha pussibel, aquistar localitats per l'archiv. Perquai vaina tscherchè alternativas e dumandà al cumün da Scuol sch'el nu pudess metter a disposiziun localitats per l'ACEB. President cumünal Christian Fanzun ha muossà grond'incletta invers nossa situaziun ed ha laschè sclerir la chosa a fuond. Il resultat ans es gnü communicà in üna charta dals 27 november 2017. Da quella resorta cha'l cumün da Scuol prevezza da drizzar aint ün archiv cumünal central a Scuol in ün dals stabilimaints existents chi sun in possess dal cumün. Ils sclerimaints e la planisaziun desso gnir fats prosmaing. Pro quista occasiun es il cumün da Scuol pront dad examinar la pussibilità da metter a disposiziun localitats eir per l'ACEB. No vain orientà il cumün da Valsot davart quist svilup. Il dret da precumprita per la chasa a S-chadatsch resta valabel e cun quai eir l'opziun da cumprar il stabilimaint. Quella sgürezza es in mincha cas fich importanta per garantir la cuntinuità dal Archiv cultural Engiadina Bassa.

Il cumün da Scuol es dal rest perinclet da surdar al ACEB la documainta istorica chi's rechatta hoz amo aint i'ls archivs dals anteriurs cumüns. Quists documaints gnaran registrats aint in nos program electronic. Uschè tils pudaina render cuntshaints ed accessibels a la populaziun in nos archiv.

Lavur dal archiv

Dal 2017 sun gnüdas praistadas in tuot 946 uras da lavur. Quai dals archivars da fin quà Cla Rauch, Cristian Juon, Armon Parolini, Peder Rauch, Jon Duri Tratschin e daspö l'on passà eir da Beat Hofmann da Scuol. Documainta es gnüda missa a disposiziun da bleras personas privatas ed eir da societats. Da manzunar sun ün grond numer da documainta e cudeschs surdats da Nicolo Men Gaudenz da Scuol sco eir ils relaschs da Guido Huder da Scuol e da Cla Valentin da Strada.

Tschlin, marz 2018

Jon Duri Tratschin, president ACEB